

SERENISSIMO
FRIDERICO,
REGIO POLONIAE,
ET
ELECTORALI SAXONIAE
PRINCIPI.

Clementissimo Poloniae Regi AUGUSTO Parenti tuo
Tomum Primum hujus Operis dicatum qua par erat veneratione
obtuli. Sine nunc quaeso, Regie ac humanissime Princeps, ut
alterum hunc praeclarissimo Nomine tuo signatum, tibi sistam,
quo palam testari pergam, quale sit meum erga tuam quoque
Regalem Celsitudinem obsequium. Ex quo enim Italianam ingre-
sus ad nobilissimum Siciliae ac Neapolis Regem CAROLUM
adduxisti elegantissimam Conjugem & Reginam MARIAM
AMALIAM, Sororem tuam, omnium oculi, aut animi, meus
vero potissimum, in te conversi fuerunt. Mirata autem fuit ma-
gnificentissima Urbs Neapolis, mirata deinde est egregias tuas
dotes vel ipsa Urbium princeps Roma. Nempe hic ille est (con-
cordi voce omnes ajunt) qui Catholicae Religionis documenta
alte in praecordiis infixa tenens, tam accurate Pietatis ubique
officia implet, ut reliquis exemplo in cultu, reverentia, ac ti-
more Numinis esse jam possit. Hic ille, qui passim splendida
Munificentiae suae vestigia relinquit. Hic etiam, cui, quamvis
numquam praecelsae Dignitatis suae modum oblito, ea tamen
est suavitas morum, comitas affabilitasque sermonis, quae om-
nium secum colloquentium animos sibi conciliet, egregiaeque
formae vultus sui lineamentis probe respondeat. Neque mihi
aliunde petendi testes tum tui felicissimi ingenii, tum animi
meliora quaeque aemulantis. Te egomet teneo, quantoque sit
Virtutum tuarum ubertas ac soliditas, experimento meo edo-
ctus, aliis testari jam possum. Quum enim Mutinam deductus
XI. Kal. Decembris, atque a Serenissimo FRANCISCO Duce
hero meo summa cum exultatione exceptus, incomparabiles Pi-
cturas, Statuas, Numismata, Bibliothecam, ceteraque Estensis
Palatii, & Mutinensis Urbis ornamenta, non cursim, sed mira-
bili attentione perpenderes, & memoriae singula mandares, me
quoque ad alloquium tuum non semel pro tua benignitate ad-
missum voluisti, ac discedens mihi illustre Liberalitatis tuae pi-
gnus reliquisti.

Tom. II.

* Sed